



Wantok

Sekim nem bilong ol Yuni studen insait..
Pes 9 - 22

Namba 2105 Januəri 15 - 21, 2015 32pes

Niuspepa Bilong Yumi Ol PNG Stret!

K1 tasol

Isi pla wei long promotim bisinis bilong yu

GUTPELA KWALITI, GUTPELA PRAIS LONG PNG

Bisinis Kads | **K120** | **K175**

200 kads + takis Printin tasol
Wanpla sait, ful kala 300 gsm pepa.

200 kads + takis wantaim desain wok

Only at... **THEODIST LTD**
THE STATIONERY SUPERMARKET
Waigani Drive, PDM 325 9800 | Markham Road, IAE 472 5488
sales@theodist.com.pg | salesae@theodist.com.pg

KOLIM MIPLA NAO!

INSAIT

Gutpela rot netwok i kamap long Esaála - P2



Kavin on seil...

Lukaut long giaman mani skim - BPNG i tok

Yakam Kelo i raitim

NO KEN givim mani bilong yu go nating long ol giaman mani skim lain insait long kantri, Gavana bilong Sentral Benk Loi Bakani i tokaut long dispela wik.

Mista Bakani i tok ol i kisim ripot olsem i gat sampela grup o lain i wok long raun na askim ol manmeri long putim mani long grup bilong ol bai ol kisim bikipela winmani mak long 100 pesen go 200 pesen intres.

Mista Bakanai i tokaut long Benk ov Papua Niugini (BPNG) ripot i go aut long pablik olsem giaman mani skim grup i raun long ol kona bilong Papua Niugini na wok long kisim mani long ol liklik manmeri na promisim ol long bikipela winmani ol inap kisim.

Ol i tok ol i gat bikipela mani tru mak long bilien na trilien kina na ol gol tu i stap wantaim Benk na ol wetim pepa wok long kli-aim ol dispela mani long kam aut. Taim ol kisim dispela mani kam aut orait ol bai peim bikipela winmani o intres go long ol membas husat i putim mani wantaim ol. Mista Bakani i tok dispela samting em benk i no gat save tru long en olsem na ol manmeri mas lukaut gut tru na no ken tromoi nating mani go long kain giaman grup olsem bikos ol bai lusim mani bilong ol.

Em i tok klia olsem Sentral Benk i no save holim akaun na mani bilong ol wan wan man o grup.

I go moa long pes 2...



Maru sapo-tim sios helt sevis long ilektoret- P6



RURAL
Kuk long ges haus i gutpela sans long wok - P29



Rait man bilong hailans i salim ol kavin long Tabari ples long Boroko long bik siti Pot Mosbi. Mi ting em kavin Sepik, bikos em wok long salim ol kavin bilong Sepik wara. Sapos yu laikim ol kainkain kavin, go daun tasol long Tabari ples Boroko. *Poto: Jada Wilson*

Em Nau!

Wantok Niuspepa bilong yumi ol PNG stret!!

Pepa bilong lainim tok pisin tu!

K1.00 tasol long olgeta hap!

Gutpela rot netwok i kamap long Esa'ala

ESA'ALA Distrik long Milen Be Provins em i wanpela distrik we ol pipel i save yusim sip na liklik dingi tasol long i go i kam long Alotau na ol narapela ailan distrik.

Tasol nau Palamen memba bilong ol na Minista bilong Sivel Eviesen, Steven Davis i kamapim senis, wantaim bikpela rot konstraksen long bungim tupela ailan bilong Normanby wantaim.

Em i gat plen tu long wokim gut gen Miadeba ples balus long givim sans long ol pipel i ken i go i kam long wanem taim ol i laikim.

Wanpela konstraksen tim i gat ol lokal ensinia na ol yut husat i kisim sampela trening long konstraksen wok nau long Normanby Ailan wantaim ol masin we distrik i bin baim.

Olgeta rot long Normanby ailan bai i go bung wantaim Miadeba ples balus na i go long Sewa Bei, basis em i klostu long Is Kep long bikples.

Long wankain we tasol, olgeta

rot long Fergusson Ailan bai i go bung wantaim Salamo, we em i maus rot bilong ailan na em i ples bilong wokim bisnis long dispela ailan.

Mani bilong kamapim ol rot i kam long Distrik Sevis Implementesen Program (DSIP) na long Nesenel Gavman. Nau ol i nidim Provinsel Gavman tu long helpim wantaim sampela mani.

"Mipela wok long yusim K4 milien bilong nesenel gavman i givim long 2014 mani bilong wokim rot long Normanby. Long 2015 mipela i gat K2 milien mani i stap long baset we bai mipela i yusim long pinisim olgeta rot netwok long Normanby ailan long dispela yia," Minista Davis i tok.

Mista Davis i tok olsem dispela rot bai kamapim gut tru sevis long helt na edukesen long ailan. Em bai sotim taim bilong wokabut long mekim bisnis long Alotau bikos ol wok bisnis bai kamap insait long distrik yet wantaim dispela ol transpot infrastraksa.



Piksa i soim nupela 6 kilomita rot bai bungim Esa'ala stesin wantaim Taulu komyuniti.

Lukaut

long giaman mani skim – BPNG i tok

I kam long pes 1...

Sentral Benk i save holim mani bilong Gavman bilong Papua Niugini na ol fainens bisnis na kampani husat i gat laisens long ranim fainens bisnis olsem benk insait long kantri.

Gavana i tok tu olsem sampela giaman lain tu i wok long yusim mobail fon na salim giaman tok save olsem yu winim sampela kain bikpela mani o winim laki loto. Olsem na yu mas salim mani go long ol ken stretim ol pepa wok na akaun long benk long salim mani bilong yu i kam.

Bos bilong Sentral Benk i tok dispela em ol giaman na stil pasin olsem na pablik mas kisim save na no ken tru kirap nogut na tromoi nating mani bilong ol.

Wantok i bin toktok wantaim wanpela man long las wik husat i opisa bilong dispela kain grup bilong mani skim long Mosbi.

Dispela man i no laik givim nem bilong em tasol em tok planti memba bilong ol bai kisim bikpela win mani bilong ol klostu tru taim Benk i klaim olgeta pepa wok na trensfea bilong mani kam long ol.

Wantok i askim nem bilong grup na wanem benk ol gat akaun wantaim tasol bikman ya i tok em insait samting bilong ol memba yet long save long kain ripot olsem.

Bikman ya i tok ol i gat planti memba insait long kantri na ol i no laikim kain kain ripot nabaut long bagarapim tingting na wanbel bilong ol membas. Em i no laik toktok moa na wokabaut go. Dispela grup ya i wok long ranim opesesen bilong ol long Laloki na bihainim Hiritano Haiwe i go insait long Sentrel provins.

Mista Bakani i tok yumi save wok hat long kisim mani olsem na no ken harim ol lain olsem bikos benk i no save long akaun bilong ol.

EHP kisim pemenen Provinsal Edministreta

OL eking wok bilong provinsal edministreta long Isten Hailans em i pinis nau, long wanem, provins i kisim pinis pemenen edministreta na bai em i no inap stap eking moa long dispela posisen.

Na SolomonTato husat i bin wok olsem deputi provinsal edministreta i go antap na kisim dispela posisen bihain long olupela edministreta Munare Uyassi i bin lusim long las 10-pela yia i go pinis.

Insait long dispela 10 yia, provins i bin makim 6-pela senia opisa long wok olsem eking provinsal edministreta. Na Tato em i wanpela bilong ol.

Tasol gavana bilong provins, Julie Soso i no wanbel long makim bilong Tato, long wanem, em i tok olsem Tato i gat ol kot kes i stap yet.

Kot o i nogat kot, ol pipel na tu ol lokol na provinsal lida bilong

Isten Hailans i amamas olsem ol i kisim wanpela pemenen provinsal edministreta long lukautim ol bikpela wok edministresen bilong provins.

Wanpela lokol lidaman, Francis Warigiso i tokim Wantok Nius olsem provins i no bin muv i go fowot long las ten yia, long wanem, provins i no bin i gat pemenen edministreta.

Em i tok amamas olsem provins i kisim Tato em wanpela senia opisa long provins na makim em olsem pemenen edministreta bilong provins.

Warigiso i tok long i go pas na mekim wok edministresen bilong provins em i no isi, olsem na long lukluk bilong em, Tato em i raitpela man em Nesenel Eksekutiv Kaunsel i makim.

Tato i bin i go insait long opis na statim opesesen olsem pemenen provinsal edministreta long Desemba las yia.



EHP PIPEL SAPOTIM TATO: Ol lokol pipel wantaim ol provinsal lida na pablik sevan bilong Isten Hailans i selebret long Goroka taun bihain long makim bilong Solomon Tato olsem pemenen provinsal edministreta bilong Isten Hailans.

Kinoku opim nupela Asosiesen

Wanpela lokol maining projek bilong digim gol na ol arapela mineral i kamap na i go het nau long mekim ol wok opesesen long boda bilong Isten Hailans, Jiwaka, Westen Hailans, Nondugl long Simbu, Ramu na Brahman long Madang na Maprik long Is Sepik provins.

Na ol lokol pipel bilong dispela 6-pela provins i amamas olsem dispela projek bai bringim ol gutpela samting na helpim i go long ol.

Long dispela tingting, ol len ona o ol papa na mama graun i kamap wantaim wanbel tingting we ol i wokbung na kirapim asosiesen we grup bai i ken i go pas long bosim na lukautim maining opesesen bai stat long Asaro long Daulo distrik, Isten Hailans.

Tasol dispela wok bilong kirapim projek em i no kam isi we insait long 7-pela yia ol lokol man



Menesing dairekta bilong Kinoku Risos Onas na Giopa Holdings Limited Wau Kondango wantaim lokol bisnisman Stanley Gotaha i katim riben. *Poto: Sape Metta*

na meri long dispela 6-pela provins i bin wok hat tru na kamapim lokol asosiesen em Kinoku Risos Onas Asosiesen na Giopa Holdings Limited we ol i bin lonsim long Asaro Edministresen senta long Daulo distrik, Isten Hailans long mun De-

semba. Menesing Dairekta bilong asosiesen Wau Kondango long taim bilong lonsing i tok, long kirapim aluviel maining projek em i no isi, long wanem, grup bilong em i wet moa long 7-pela yia long mekim ol pepa wok, paitim

toktok wantaim ol atoriti, na bihain long kisim tok orait, na projek em i kirap.

Em i tok grup bilong em i kisim moa long wan handet ol len ona o papa na mama graun husat i serim boda wantaim Isten Hailans long i go pas long lukautim na ranim dispela projek.

Mista Kondango i tok tru olsem wok bilong projek wok bilong maining bai i ken stat liklik, tasol benefit we bai i kam long en baik i ken i go long ol pipel bilong 6-pela provins husat i serim boda wantaim Isten Hailans.

Em i tok amamas long sapot i kam long lidaman na lokol bisnisman Stanley Gotaha, Mimanalo LLG kaunsel presiden Kessy Maliwe, LLG presiden bilong Apa Asaro Kambok Michael na sif John Mondo husat i bin wok hat tru long kisim masin bilong digim gol na bringim tu dispela projek i kam inap long lonsing i bin kamap long mun i go pinis.

Tiket bilong ol sumatin i no redi yet

Esther Bralyn Wani
UPNG sumatin i raitim...

“Tiket bilong ol sumatin husat i stap long sponsa bilong Opis bilong Haia Edukesen (OHE) i no redi bikos ol i no kisim ol opa leta bilong ol yet tasol opa leta bilong ol bai redi long dispela wik,” Sasha Korah bilong Sumatin Sapot Skolasip Brens long Dipatmen bilong Haia Edukesen i tok.

Ol nem bilong ol sumatin i mekim Gret 10 na 12 bai go long sekenderi, kolis na yuivesiti i kamap pinis long ol niuspepa na i stap long OHE opis na Fincorp tu. Nem lista bilong ol Gret 12 i stap long OHE na nem bilong ol Gret 10 i stap long Fincorp.

Talis Yana bilong Isten Hailans em i wokim Gret 12 long Gordon Sekenderi i tok em i kisim 3 poin GPA tasol nem bilong em i no stap long pepa na em i go sekim long OHE tu na no gat. Em i putim sois bilong em long Yunivesiti bilong Goroka na em i tingting long traim long painim narapela skul nau.

Em i tingting planti tasol nau em i amamas tru olsem nem bilong em i stap long pepa we pastaim em i no lukim gut.

Wanpela papa, Wai Jones em i sekim nem bilong pikinini man bilong em i save wokim Gret 10 long Kila Kila Hai Skul na em i putim sois bilong em long Gerehu tasol nem bilong em i no stap. Na em i save olsem em i wokim gut long wanem em i sekim yet tasol em i no save olsem nem bilong ol Gret 10 i stap long Fincorp bilding.

Sampela sumatin i stap long bus long ol narapela provins we ol i no gat hap long baim niuspepa tasol ol wantok bilong ol i stap long Pot Mosbi i helpim ol long sekim nem bilong ol long OHE.

Veronica Mwuaoli bilong Alotau i sekim nem bilong liklik brata bilong em i stap long ples we em i harim ol sampela lain i tok em bai go long UPNG.

Ples bilong ol i stap long we long taun long wanem bikpela susa bilong em i go long OHE long sekim nem bilong Thompson Elisania i pinis long Wesley Sekenderi long Salamo.



SEKIM NEM:
Ol sumatin i sekim nem bilong ol long OHE lista bot ausait long opis bilong ol long Waigani.

Poto: Esther Bralyn Wani



Project fees, New uniforms, Text books? Start the year on a good note with all your back to school needs financed through a

BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval



320 1212 / 7030 1212 - 24/7
servicebsp@bsp.com.pg
www.bsp.com.pg



Official Sponsor of the 2015 Pacific Games

Sief Seketeri givim strongpela tok lukaut

Sief Seketeri bilong Gavman Sir Manasupe Zurenuoc i tokaut long ol dipatmen i ken karim aut gavman na Nesenel Eksekutiv Kaunsil Kopret Plen long dispela yia i go inap yia 2017.

Em i tok olsem ol i no senisim ol wok bilong Helt, Edukesen, Lo na Oda, Transpot infrastraksa, na ol rot bilong kisim mani we ol i prairiti eria bilong dipatmen.

Ol dispela i ken helpim dipatmen long sapotim wok bilong gavman. Dispela ol prairiti i stap long helpim na banisim ol long pasin bilong korapsen.

Long dispela as em i laikim olgeta opisa bilong olgeta dipatmen i mas save gut long ol sistem bilong gavman na wanem samting gavman i laikim.

Em i tok tu olsem ol i mas yusim gut hamas mani ol i givim aut long baset bilong dispela yia long mekim wok bilong ol.

“Mi bin tok nogat pinis long haia long ol praivet kar nating nating. Mi laikim ol dispela dipatmen i no ken raun long bikpela kar olsem len krusa tasol ol i ken raun long liklik kar sapos ol i raun insait long Mosbi Siti,” Sief Seketeri i tok.

Em i tok i no gutpela long wokim bikpela pati long tokaut long Kopret Plen tasol samting tru bilong dipatmen i no kamap yet.

Sir Manasupe i tok long dispela yia em i no laik lukim ol dipatmen i yusim mani nating.

Em i tok moabeta ol i mas kamapim wanpela wok long soim han mak bilong ol.

Stretim maket na strongim iekonomik laip bilong ol Manus

GAVANA bilong Manus Provins, Charlie Benjamin na Australia Hai Komisina long Papua Niugini, Deborah Stokes, i opim Manus Provinsal Maket, we ol i bin stretim wantaim helpim bilong Australia gavman long mani mak bilong K7.2 milien.

Dispela nupela maket nau bai skruim wok iekonomi bilong ol pipel bilong Manus i go bikpela moa.

Hai Komisina Deborah Stokes i tok, nupela developmen bilong maket i wanpela hap bilong helpim i kam long Australia gavman bilong ol Manus stret aninit long Manus Provins long wok bilong lukautim Rijional Prosesing Senta, wantaim bikpela mak mani i winim AU \$37 milien (K51 milien).

“Maket nau i gat 70 ples redi long maket na em bai helpim tru ol mama na ol yangpela meri long strongim iekonomik laip bilong ol. Wanpela bikpela tingting bilong

Australia em long helpim ol mama na ol meri long iekonomik wok bilong ol,” Mis Stokes i tok.

“Ol meri long maket i stap olsem bun baksait bilong PNG na dispela maket i givim sans long ol i kamapim gutpela laip,” em i tok.

Nupela developmen bilong maket i karamapim ol dispela hap; nupela pis na mit maket, 8-pela stua bilong salim klos; pilai graun bilong pikinini; nupela rup disain wantaim planti spes bilong kisim win gut; wanpela nupela toilet bilong ol meri na tu ol i stretim gen olpela toilet bilong meri na man tu; sekyuriti lait; stretim lukluk bilong eria; stretim gen na penim ausait banis; na stretim gen polis autpos.

Mis Stokes i tenkim Manus Provinsal Edministresen na Provinsal Teknikol Sevis Divison long wok patnasip bilong ol wantaim Australia long pinisim gut dispela projek.



Australia Hai Komisina Deborah Stokes na Manus Provinsal Gavana Charlie Benjamin i opim Manus Maket long Lorengau long dispela wik. *Poto: Australia Hai Komisen*

Ol narapela helpim bilong Australia i go long Manus em rot na nupela skul infrastraksa, wokim nupela polis stesin, komyuniti developmen wok, yut na spot, na helpim Lorengau haus sik.



Nupela maket bilong Manus i op nau.

Trausel i swim long Goroka!



Noken ting olsem ol trausel i save stap na raun tasol long ol wara na tais long ol nambis ples, no gat. Ol i save raun i go antap tu long ol ples maunten olsem Melo Ken i gat 11-pela krismas bilong Goroka, Isten Hailans i painim aut.

Dispela trausel long taim emi liklik yet i bin kamap na slip olsem wanpela ston long liklik tais wara arere long famili haus

bilong Melo long Genoka Setlemen long 2012. i no gat narapela famili memba i bin save long dispela na bihain long tupela krismas, trausel i gro na kamap bikpela na Melo i kisim em i kam aut na raun long publik. Na planti man, meri na pikinini i bin kirap no gut long lukim kain samting i kamap long setelmen eria bilong ol.

Poto: Sape Metta

Naispela Renbo maket i pas

RENBO maket em wanpela bilong ol naispela maket insait long Mosbi. Planti manmeri save laikim long go maket long hap long wanem em seif na tu em save op i go long nait. Ol lain long Waigani, UNI, Gerehu,

Tokara na Hohola tu i save kam long dispela liklik maket long baim ol gaden kaikai bilong ol.

Maski prais i dia liklik tasol bikpela samting em seif long ol i maket long laik bilong ol na bihain kalap long bas o kar bilong ol na go seif.

Maket yah i pas long dispela wik long wanem papa graun i laik developim dispela liklik hap olsem na em i askim ol polis long kam tok save long ol lain husat save maket olsem bai maket i pas.

Dispela i mekim ol maket lain husat save salim ol kaikai na tu ol manmeri husat save baim kaikai i wari liklik long wanem, bai ol painim ples long mekim maket na tu salim kaikai bilong ol.

Planti ol maket long Mosbi ol man-



Renbo maket em i naispela maket tasol nau em i pas.

meri husat save salim kaikai save putim mak long ples bilong ol. Sapos yu nupela manmeri kam bai ol tokim yu long lusim dispela hap long wanem ol kam pas na save maket long dispela hap.

Dispela i mekim ol manmeri long Renbo maket i painim hat long go salim ol kaikai bilong ol long Gerehu na Waigani maket long wanem, ol

dispela lain husat stap bipo bai rausim ol.

Ol maket lain na ol publik manmeri husat save maket long long Renbo maket i singaut nau long memba bilong ol, Michael Malabag na Gavana bilong NCD Powes Parkop long kam na harim wari bilong ol na tu painim wanpela liklik hap insait long Renbo long mekim maket bilong ol.

Banis sut em i gutpela banis bilong pikinini

OLGETA Papua Niugini i mas kisim ol pikinini bilong ol i go long haus sik long kisim banis sut o marasin long stopim sampela strongpela kain sik we inap long bagarapim ol na kamapim dai tu.

Vaksinesen o banis sut na marasin em i no gat bikpela fi na em i gutpela na seif we long stopim ol sampela kain sik.

Vaksinesen i sevim planti milien laip pinis na em save banisim gut

ol pikinini na pablik long ol kain kain sik nogut i save kamap long wol na Papua Niugini tu.

Nesene Dipatmen bilong Helt (NDOH), wantaim Wol Helt Oge-naisesen (WHO) na UNICEF i gat bikpela wari long sampela toktok i bin kamap long media we i toktok ol Papua Niugini long ol i no ken kisim ol pikinini i go long kisim vaksinesen. Wampela pastaim helt minista i mekim tok lukaut i go long ol mama na papa long ol i no ken

kisim ol pikinini i go long haus sik long kisim banis sut na marasin bikos em i tok, ol marasin i save bagarapim kru bilong het o sampela hap bodi.

Dispela em i rong tok save tru na i no gut tru long em i kam long wampela pastaim helt minista.

Dispela tok save i go long stretim dispela kain rong toktok olsem ol papamama i no ken bihainim dispela kain giaman toktok.

Insait long 21 handet yia, namba bilong ol lain i dai long ol sik we banis sut inap long stopim long wol i stap long sampela tausen tasol. Na yumi askim bilong wanem na em i stap long dispela mak? Em i bikos yumi gat banis sut.

I gat mak olsem long 20 handet yia klostu long namba i winim 5.2 bilien pipel i dai na klostu 1.7 bilien pipel i dai long ol sik i save kamap long ol bi-natang i save kalap i go i kam namel long ol olsem: Dipteria-0.76 milien, Hepatit B-12.7 milien, Misels-96.7 milien, Meninjaitis-21.9 milien, Polio-0.13 milien, Smolpoks-400 milien, Tetanus-37.1 milien na huping kof-38.1 milien dai.

Long Papua Niugini, stori bilong ol sik misels long nau i kamapim sampela dai namel long ol pikinini. PNG i bin

kamap fri pinis long sik misels inap planti yia i kam bikos long gutpela imunaisesen o banis sut na marasin, i kam inap long wampela hevi i kamap long 2013 na nau yet i gat ripot long ol provins olsem dispela sik i stap yet long sampela hap.

Sik misels nau em i kamap bilong wanem i no gat inap wok bilong givim banis sut na marasin i kamap long ol dispela ples long stopim sik long kam insait long kantri, na i go long ol komyuniti we ol lain husat i no kisim banis marasin i stap.

I gat planti moa pikinini long Papua Niugini bai dai long ol sik we banis sut inap long stopim olsem whooping cough, meningitis, pneumonia, na neonatal tetanus na planti i kisim bagarap long bodi tu long ol dispela sik.

Olgeta kantri long wol i save givim banis sut long ol pikinini bilong ol. Planti kantri i winim pinis ol dispela sik na ol i no moa i stap long kantri bilong ol bikos long gutpela vaksinesen. Pastaim long polio vaksinesen i kamap, planti pikinini long wol i bin dai long dispela sik. Long PNG, sampela bikpela lain nau i stap yet wantaim bodi i bagarap long dispela sik poliomyelitis. Tasol nau, PNG, tu wankain olsem ol narapela hap long wol, i rausim pinis polio wantaim gutpela vaksinesen.

Vaksinesen em i wankain olsem ol narapela marasin we em i gat gutpela na no gut bilong en. Wok bilong banis sut em bilong kamapim banis long bodi bilong man na taim marasin i go insait long bodi, em i save kirap long pait bek. Sampela taim, vaksinesen i save kamapim sampela liklik hevi long skin olsem skin hat na ol narapela senis long bodi i save kamap tasol dispela em i orait. Antap long dispela, sampela vaksin i gat ol hap bilong sut marasin o entibaiotik i stap em i ken mekim bodi i senis liklik. Sampela bai pilim pen, solap na skin ret long hap we ol i kisim sut long en. Klostu hap namba bilong ol pikinini i kisim banis sut bai lukim sampela kain bodi senis olsem skin hot.

Ol dispela kain senis i save kamap insait long wampela o tupela de bihain long imunaisesen, tasol ol mak bilong banis sut bilong misels i ken stap inap 5 i go 12-pela de bihain long ol i kisim marasin. Sampela skin hat na skrap i save kamap long misels vaksin tasol i no olgeta. Sampela em ol sik bilong pikinini tasol na em i save pinis.

Yumi laikim gutpela samting long ol pikinini bilong yumi olsem na gutpela we long lukautim olsem yumi mas kisim ol i go long kisim vaksinesen. Olgeta papamama i mas kisim tok save long ol helt lain tasol long ol toktok bilong helt, na i no ken harim kain kain tok nabaut.

Hugo Canning Ocean Blue Promosen Wina

HUGO Canning Kampani i pinisim wampela moa yia bilong Ocean Blue promosen wantaim bikpela dro long Desember las yia.

Ol wina we kampani i tokaut nem bilong ol em; yangpela gel, Delma Vagi Morea bilong Tubusereia long Sentral Provins olsem Wina bilong nambis lain. Em i winim wampela Yamaha 23ft banana bot wantaim wampela Yamaha 40hp mota.

Long Hailans Rijon, Tim Yaovi bilong Goroka long Isten Hailans Provins em wina bilong Hailans husat

i winim wampela smatpela Disel Ute.

Polis Konstabol Peter Tedor wantaim Hugo Canning Kampani opisa Elsie Vali na Midia Patna woklain i bin stap long wintesim dispela dro.

Promosen Kodineta, Jannelle Mani-hia, Hugo Canning kampani i wok strong long givim sampela samting i go bek long kastoma bilong en.


"Mipela laik tok tenkyu long olgeta lain husat i putim nem long dispela promosen na long sanap strong yet wantaim Ocean Blue bren," Mis Maniha i tok.



Wina bilong nambis sait: Delma Vagi Morea i kisim ki bilong Yamaha 40hp mota ensin long wokmeri bilong Hugo Canning. Mama na papa bilong en i stap wantaim.



Wina bilong Hailans rijon: Tim Yaovi bilong Goroka i kisim ki bilong kar long wokmeri bilong Hugo Canning.



PABLIK TOKSAVE

WOK BILONG KATIM PAWA ANINIT LONG STET OV EMEJENSI INSAIT LONG ELEKTRISITI INDASTRI

Toksave i go long olgeta elektrisiti kastoma insait long kantri olsem PNG Power i kisim tok orait kam long Gavman aninit long Stet ov Emejensi long katim ol pawa saplai insait long kantri long kisim ol mani bilong pawa we ol kastoma i no peim longpela taim i kam. Dispela em Stet ov Emejensi we Gavman i kamapim long Elektrisiti Indastri long helpim PNG Power i mekim mani.

Ol eletrisiti kastoma mas bihainim dispela toksave:

1. Ol elektrisiti kastoma husat i gat autstending pawa bil we ol i no baim yet mas go long PNG Power ofis na toktok long stretim pawa bil bilong ol stat long 9 go long 13 Januari 2015.
2. Olgeta PNG Power kastoma husat i no kisim pawa long stretpela rot olsem abrusim mita, bagarapim mita, wokim koneksen bilong ol yet i mas go long PNG Power ofis na stretim aplikesen pepa long kisim stret pawa koneksen stat long 9 go long 13 Januari 2015.
3. Aninit long Stet ov Emejensi Regulesen, sapos yu no stretim pawa bil na stretim gut pawa koneksen long 9 inap 13 Januari, 2015 bai:
 - PNG Power bai katim pawa saplai long banis blong yu
 - PNG Power bai kisim yu go long kot na odarim yu long peim K100,000 sas na K500,000 sas long ol bisnis haus.
 - Go kalabus inap 6-pela mun


Nem bilong olgeta kastoma wantaim pawa bil autstending bil bai kam aut long niuspepa long neks wik.

Olsem na long abrusim ol hevi i kamap long yu, plis go peim ol pawa bil bilong yu na aplai long kisim stretpela pawa koneksen kam long haus blong yu.

Sapos yu laik kisim moa save long Stet ov Emejensi long ol pawa bil yu no bin peim yet, ringim hotlain namba long 76535261.

Narapela hotlain namba bilong ripotim ol pasin bilong hait na stilim pawa, bagarapim mita boks na mekim koneksen ausait long mita bai kam aut liklik taim long pablik ken ripotim ol pasin bilong stilim pawa.

Sapos yu no go lukim ol Ofisa bilong PNG Power long stretim autstending bilong yu insaitlong dispela taim, yu mas go nau bipo long ol wokman bilong PNG Power i kam long haus o banis bilong yu.



Toksave i kam long Kontrola bilong Stet ov Emejensi long Elektrisiti Indastri.

Minista Maru Sapotim Sios Helt sevis long Iektoret

SASSOYA Sab-Helt Senta insait long Yangoru/Saussia Distrik long Is Sepik i bin opim wanpela nupela haus sik wod na dispela i opim rot long moa woklain bai go insait na kampaim gutpela helt kea sevis long ol pipel.

Minista bilong Treid, Komes na Industri na Memba bilong Yangoru/Saussia, Richard Maru i bin helpim wantaim K100,000 long wokim dispela nupela wod bilong sab-helt senta.

Long dispela mani, ol i peim K75,000 i go long Garamut Hadwea long baim ol konstraksen matiriel bilong nupela wod na narapela K25,000 em i stap yet long baim ol medikol ikwipmen long Oxford Medikol Saplai.

Sassoya Sab-Helt Senta (SHC) em i wanpela bilong ol tupela helt fasiliti i stap long Yangoru/Saussia distrik we Katoli Helt Sevis, long Wewak Daiosis i lukautim aninit long Kristen Helt Sevis (PNG).

Helt Seketeri bilong Katoli Helt Sevis (Wewak) Sista Celine Yakasere i tok nupela wod bai helpim ol pipel bilong Yangoru/Saussia na em i tenkyu



Hon. Richard Maru i kisim wanpela presen olsem tok tenkyu i kam long Numbo LLG Presiden Michael Kombo long taim bilong opim nupela wod.

stret long Memba bilong ol long sapatim dispela helt sevis wok kamap.

“Nupela wod bai helpim mipela gut. Yu em trupela lida wantaim visen long kamapim gut laip bilong

ol pipel insait long distrik bilong yu na God bai blesim yu. Olsem lida God i singautim yumi long helpim ol pipel bilong yumi na mi tenkim yu long sapat bilong yu,” Sista Celine i tok long taim bilong opim nupela

wod long Januəri 6.

Sab-Helt Senta i bin kisim pinis ilektrisiti pawa long taun saplai na dispela i save helpim gut ol nes long lukim ol siklain long nait, olsem ol mama husat i wet long

karim bebi na ol narapela imejensi sik.

Na tu wanpela midwaif o nes bilong helpim ol mama long karim nau i wok long wokim Pap smia tes o tes bilong painim sik kensa long rot bilong karim bebi.

Em i bin sekim pinis 150 mama na ol husat i nidim moa tes, em i salim ol i go long bikpela haus sik Boram long Wewak.

Sassoya Sab-Helt Senta em wanpela tasol aninit long Katoli Helt Sevis, long Wewak Daiosis we i save givim Voluntari Kaunseling Testing (VCT) sevis.

Sista Celine i tok ol narapela Katolik Helt fasiliti em long Warabung Et Pos long Wes Yangoru LLG, we em i hop olsem wanpela taim bai em tu i ken kisim sapat long LLG na distrik long kamap olsem Sab-Helt Senta mak.

Kristen Helt Sevis Deputi CEO Bernard Rutmat i mekim luksave long wok bilong Mista Maru long sapatim wok bilong Sios helt sevis deliveri. Em i tok ol narapela politisen tu i mas bihainim pasin Mista Maru i mekim long sapatim ol sios.

Medivac sevis helikopta bilong Esa'ala.



Esa'ala distrik lonsim Medivac sevis

ESA'ALA distrik long Milen Bei tude i lonsim nupela Medivac sevis long helpim ol siklain long taim bilong imejensi.

Dispela i lukim wanpela helikopta nau i stap long bringim ol siklain i go long helt senta long distrik long bringim i go long Alotau.

Esa'ala distrik i kisim dispela Medivac sevis aninit long Distrik patnasip wantaim Pasifik Intenesenel Haus Sik (PIH) long kamapim gutpela helt sevis deliveri.

Minista Davis i bin sainim dispela medikol sevis kontrak wantaim PIH long las yia.

Westen provins i kamapim wanpela Imejensi Tas fos

Planti saveman bilong Helt i kamapim wanpela Imejensi Tas Fos Tim long Westen provins husat bai wokim ol programs long daunim sik Misels.

Long dispela Imejensi Tim, i gat wan wan mausman bilong olgeta stekholda olsem, ol klinik na haus sik we gavman i ronim, mausman bilong Katolik Helt Sevis long Kiunga-Daru Daiosis, Not Flai Helt Sevis na Evanjelikal sios bilong PNG.

Tasfos tim Kodineta, Godfrey Bunot man husat i lukautim Not Flai Distrik famili helt sevis i tok olsem namba bilong ol bikpela man husat i kisim dispela sik em i go antap winim bipo.

“Long dispela as mipela ol wan mausman i pasim tok long kamapim dispela tim na wokim awenes long daunim dispela sik long Westen Provins.” Bunot i tok.

Em i tok olsem long daunim dispela hevi, ol bai karem aut Imunaisesen program long Not Flai eria long 15-pela dei we em bai karamapim ol pikinini husat i gat 6-pela mun i go inap long ol bikpela husat i gat 18-pela krismas.

Long mekim dispela program i karem kaikai, em i tok ol i nidim helpim bilong Provinsel gavman na tu luksave bilong Helt dipatmen.

Long nau, Sita Sika mausman bilong katolik

Helt Sevis i tok ol i karem aut Imunaisesen program tupela taim las yia na lusim bikos long hevi bilong mani.

Long dispela taim ol i lukluk long ol pikinini tasol ol ino inap long pinisim olgeta eria insait long Not Flai Distrik.

Tasol nau ol i tok long ol bai karem aut dispela program long olgeta bikpela man na meri long ples longwe long maunten na tu long nambis.

Em i tok namba bilong husat bikpela man i kisim dispela sik igo antap long 42 we ol bai statim dispela program insait long Olsobib LLG long ples maunten we balus na helikopta tasol bai igo long em.

HIV AIDS i go bikpela long Kiunga

MASKI namba wan het tok long Wol AIDS de long las yia em “ziro mak” bilong HIV/AIDS long binatang long wol Papua Niugini i lukim yet nupela namba i go antap, wankain olsem long Kiunga long Westen Provins.

I gat 38 HIV/AIDS pipel ol i ripotim pinis long Kiunga Rural Haus sik tasol long 2014. Na long olgeta yia kam inap long 2011, planti ripot i save kamap. Sista Alis Rosario husat i lukautim Kiunga Rurel Haus sik Volanteri Kaunseling na Testing (VCT) yunit i tok aut olsem.

Sista Rosario i tok long 38 pipel, 12-pela i kisim marasin stap tasol 26 i no gat na dispela em i bikpela hevi long Kiunga.

“Long Not Flai distrik, mipela i gat 4-pela VCT hap, wanpela long Tabubil, Kiunga Rurel Haus sik na Rumginae haus sik na Gud Samaritan VCT senta,” Sista Rosraio i tok.

Sista Rosario i tok 26 pipel

Yusim kondom oltaim!



husat i gat HIV em ol nupela marit.

Em i tok moa olsem ol i gat 4-pela VCT tasol long PNG planti pipel i no save laik go long tes long save olsem ol i gat binatang bilong sik o no gat.

Em i tok dispela namba em bilong Kiunga, tasol sapos ol i kisim bilong 3-pela hap olgeta we VCT i stap long en, bai namba i go antap tru. Dispela ol namba i kam long ol mama na ol meri tasol na ol man i hait na givim sik long ol pipel yet.

Em i askim ol pipel long go wokim tes long save long status bilong ol na wokim ol gutpela disisen long laip bilong ol. Na em i tok planti meri i gat bel i mas go na kisim tes long banisim bebi long bel bilong ol.

Sista Rosario ii bin wanpela bilong ol helt lain husat ii mekim toktok long taim Not Flai Distrik AIDS Kaunsel i holim Wol AIDS de long Desemba las yia we ‘siro’, em i het tok bilong Wol Aids De selebresen.

U.S. Admiral go pas long 2015 PNG Meri Bung

RIAR Edmiral Cari Thomas, wanpela bikpela meri opisa long U.S Kos Gat, bai wanpela bilong ol spika long 2015 Papua Niugini Meri Bung.

Dispela bikpela kibung bai kamap long Pot Mosbi long Mas 9 i go long 11 long Crown Plaza Hotel. U.S Embesi long Pot Mosbi wantaim PNG gavman i go pas long kamap bilong dispela bung.

Ol bai makim ol lokal meri long stap long dispela bung bihainim ol nominesen proses. Nominesen bai pas long Fraide Januari 23.

Edmiral Thomas bai givim stori bilong em long

wok bilong em na wanem kain rot em i bihainim long kamap long posisen bilong em nau we em i antap tru long mak bilong U.S Nevi bilong Amerika. Em i go antap tru long ples we bipo ol man tasol i save stap long dispela wok. Em bai stori long we bilong daunim pasin bilong lukdaun long meri na long kamap long wanem hap em i stap nau.

Edmiral Thomas em i Komanda bilong 14 Kos Gat Distrik, we em i gat wok long karamapim moa long 12.2 milien skwea mail na i karamapim ol Ailan bilong Hawaii, Guam Amerika Samoa na arapela wok long Saipan,

Singapore na Japan.

Long dispela yia, dispela meri bung bai lukluk long skruim jenda jastis na ikonik sans long ol meri i go. Em bai i gat ol spika bilong PNG na long wol olsem Marga Fripp, Faunda na Presiden bilong Em-

powed Wimen Intenesenel, husat bai i go pas long semina bilong gutpela pasin long bisnis menesmen long givim ol PNG bisnis meri na NGO lida long ol we bilong kamap gutpela insait long wok bilong ol. Fripp em i

winim ol awod long sosel entreprena na intenesenel konsalten long lidasip na empawamen bilong olmeri na em i gat 20 yia ekspiens long stretim ol hevi. Em i save yusim ats, in-



Admiral Thomas

ovesen o nupela we, na entreprenasip.

Dispela bung em i no gat kos bilong en. Olgeta i welkam long

kamap tasol ol i mas pulimapim wanpela pepa na salim i go long Amerika Embesi long Pot Mosbi.



Yut, Meri na Famili
Pastor Barbara Lunge

Taim bilong yumi kra na bel wari i pinis nau

God i givim yumi pinis gutpela taim. Ritim stori bilong Josua long sapta 6 na bai yu save. Em i tok tok long 7-pela de bilong tingim prea. God i givim tupela baibel sapta long bekim prea bilong yumi olsem:

Stilman i mas bekim bek samting em i stilim inap 7-pela taim. Lukluk long kisim 7-pela taim blesing bilong yu nau. "Tasol sapos ol i painimaut long dispela samting em i bin mekim, orait bai ol i kotim em na em i mas bekim planti samting moa, inap long pinisim olgeta samting long haus bilong en." Gutpela Sindaun 6:31, Kisim Bek 22:1-22,

Namba tu, em i taim bilong kirapim gen samting. Seventi yia bilong Israel i stap long kalabus em i pinis nau. "Bikpela i tok olsem, 'Yupela lain bilong Jekop, yupela wokman na wokmeri bilong mi, yupela i no ken pret na kirap nogut. Tru tumas, bai mi kisim bek yupela long dispela longwe ples yupela i stap kalabus long en. Na bai yupela i kam bek long graun bilong yupela yet na sindaun gut. Na i no gat wanpela lain bai i mekim yupela i pret. Mi Bikpela, mi stap wantaim yupela bilong helpim yupela. Mi bai pinisim tru ol dispela lain pipel mi bin rausim yupela i go i stap namel long ol. Tasol mi no ken pinisim yupela. Tru, bai mi mekim save long yupela, tasol mi bihainim stretpela pasin tasol na mi stretim yupela.' Bikpela i tok olsem, 'Israel ol i bin paitim yu nogut tru, na bikpela sua bilong yu i no inap drai. I no gat man bilong beten long mi bilong helpim yu. Na i no gat marasin bilong mekim skin bilong yu i orait gen.' Jeremaia 29:10-13.

"70 yia i pinis, orait mi Bikpela, bai mi mekim save long king bilong Babilon na long ol manmeri bilong en, bilong bekim pasin nogut ol i bin mekim. Na mi bai bagarapim kantri Babilon em kantri Kaldia, na bai graun bilong Babilon i stap nating oltaim, oltaim. Jer 25:12.

Yumi sios i pas wantaim Israel. Taim bilong bagarap i pinis na taim bilong blesing i kam nau long yumi. Nau taim bilong blesing. Ritim long Aisaia sapta 51 na 52. Buk Song 126, na Aisaiah 30:26.



'your life our business'

PRICES REGULATION ACT (CHAPTER 320)

WATER AND SEWERAGE SERVICES PRICES ORDER 2015 (WATER PNG)

Made by the Independent Consumer and Competition Commission under Section 21 of the *Prices Regulation Act (Chapter 320)*.

The Tariffs Water PNG shall apply in 2015 for Water & Sewerage Services shall be the same as the year 2014 Tariffs for such services published by the Commission in the National Gazette No.564, dated 19th December 2013.

This order is to come into operation as of January 01, 2015.

This Schedule relates to the maximum Water and Sewerage rates for all Water Supply and Sewerage services supplied by Water PNG. The maximum prices which may be charged by Water PNG in respect of any accounts issued on or after the date of publication of this Order in the National Gazette (other than arrears which may only be charged at the maximum prices prevailing when those charges were incurred) are as follows:

SCHEDULE

SERVICES	TARIFF (Kina)
1.0 Water Supply	
1.1 0 to 12 Kilolitres	16.00 (minimum charge)
1.2 Above 12 Kilolitres	5.10 per kilolitre
1.3 Water Tankers per 10 Kilolitres	51.00 per 10 kilolitres
2.0 Sewerage	
2.1 Non Industrial Customers	
2.1.1 0 to 12 Kilolitres	11.10 (minimum charge)
2.1.2 Above 12 Kilolitres	11 per kilolitre
2.2 Industrial Customers	2.22 per kilolitre
2.3 Sludge Tankers per 10 Kilolitres	33.30 per 10 kilolitres
3.0 Connection Fees	
3.1 Standard Connections -	Water Free
3.2 Non Standard Connection -	Water At cost
3.3 Reconnection - Water	72 per reconnection
4.0 Standby Fees	
4.1 Standby Fee - Water	2.22 per kilolitre
4.2 Standby Fee - Sewerage	1.11 kilolitre

The above rates are expressed in Kina and are exclusive of Goods and Services Taxes (GST).

Dated this 2nd Day of January 2015

Mr Raka Taviri, Jr
Chief Executive/ Managing Director
On behalf of the Water PNG

SVD bung long Madang

**Pater Victor Roche, SVD,
i raitim**

SERIM ol ekspiens na wok wantaim olsem ol Divain Wod Misineri (SVD) long PNG” em i as long Asembli bung bilong ol kongriksen memba long Madang las wik.

Samting olsem 64 SVD misineri pater na bruder i wok long olgeta hap bilong PNG i bin stap insait long 4-pela de asembli bung bilong ol long Alexishafen, Madang we i pinis long las Sande, Janueri 10.

Provinsal bilong ol SVD long PNG Provins, Pater Joe Maciolek i tok as bilong dispela asembli em long “serim ol ekspiens na wok wantaim olsem ol Divain Wod Misineri (SVD) long PNG.

“Em i gutpela sans long serim samting we Pop i toktok long pas bilong em olsem “Amamas bilong Gutnius”.

Asembli i kamap long wankain taim we Pop i makim dispela yia olsem “Yia bilong ol lain i givim laip bilong ol i go long Bikpela”.

Tim lida bilong Ogenaising Komiti, Pater Giovanni Bustos, i tok dispela bodi o grup i stap long asembli i no bilong mekim ol disisen o wok plen o glasim ol samt-



SVD ASEMBLI: Ol SVD pater na bruder i bin stap long asembli bung bilog ol long Alexishafen, Madang. *Poto: Pater Victor Roche, SVD*

ing i karamapim ol SVD long PNG, no gat.

Tasol ol i bin gat ol ektiviti olsem Baibel sering, toktok long “amamas long Gospel”, wokim ol grup diskasen, wan wan i sea long ol gutpela samting, ol salens long wok olsem wanpela SVD misineri insait long dispela kantri na wokim misa lotu olsem ol misineri wantaim

lewa i gat tok tenkyu.

I gat 102 SVD pater na Bruder husat i kam long 22 kantri long wol i wok nau long PNG.

SVD i sanap long “Societas Verbi Divini” long tokples Latin na long mekim sotpela, ol i kolim SVD. Na ol misineri em ol i kolim ol long ol “Divine Word Missionaries”.

Namba wan SVD misineri i bin

kamap long PNG long Ogas 13, 1896 na krugitim Alexishafen long Madang. Bihain, em i bin muv i go long Tumleo Ailan klostu long Aitape long kirapim wok misineri.

Dispela em wanpela as we ol i bin holim asembli long Alexishafen, ples we olgeta samting i bin stat.

Ol SVD pater na bruder i wok long planti hap bilong PNG. Na em

i wanpela long ol bikpela kongriksen bilong ol man long PNG.

Long ol yia long 1970’s na 80’s, i bin gat samting olsem 270 SVD pater na bruder, tasol nau i gat 102 i wok long 8-pela Katolik daiosis long PNG.

Dispela em namba tu SVD asembli kongriksen i holim insait long 119 yia bilong ol long PNG.

Katolik Sios i gat 15 nupela Kadinel

KATOLIK Sios long Pasifik riji on i gat tupela nupela Kadinel.

Long dispela nupela yia, hetman bilong Katolik Sios long wol, Pop Francis, i makim Asbisop bilong Wellington, John Atcherley Dew i gat 66 krismas olsem hetman bilong Katolik Sios long Nu Silan. Narapela em long

Asbisop Soane Patita Paini Mafi i gat 53 krismas bilong Tonga long go pas long Katolik Sios long dispela liklik Pasifik Ailan kantri.

Kadinel Paini Mafi i yangpela long olgeta nupela kadinel we Pop i makim nau tasol.

Pop i bin makim 20 nupela kadinel bilong sios

long nupela yia we 5-pela i bilong Esia na Pasifik, tripela bilong Afrika na 5-pela bilong Latin Amerika.

Long ol nupela kadinel, 15-pela i ken vot long nupela Pop bikos krismas bilong ol i stap aninit long 80 yia.

Bisop Paini Mafi i kamap olsem namba

wan kadinel long ol Polinesia Ailan.

Pop i no bin makim wanpela kadinel long Amerika o Kanada.

Ol bai wokim lotu long ol bikman i kamap ol kadinel na go insait long nupela wok bilong ol long neks mun, Febueri 14, 2015.

UPC sios opim nupea sios bilding long Goroka

Sape Metta i raitim

OL sios i save mekim bikpela wok long kamapim gut ol man, meri na pikinini i tanim bel, senisim ol pasin na givim baksait long ol pasin no gut.

Mekim olsem na wanwan komyuniti i save painim gutpela sindaun.

Na wanpela long dispela ol sios em Yunaited Pentikostol Asemblis Genesis sios we i stap long Kamaeria long Goroka, Isten Hailans.

Olsem wanpela liklik sios we ol sios memba i bin bildim long ol bus metiriel, Genesis sios i bin kirap long 1997 wantaim liklik lain tasol na em i mekim wok long senisim planti man, meri na pikinini.

Dispela i mekim na sios i gro na kamap bikpela na bihain long 15 yia krismas, sios i rausim olpela

bus metiriel bilding na sanapim wanpela nupela bilding.

Wantaim bikpela pasin amamas, ol kongriksen memba i bin selebret long taim sios i opim nupela bilding bilong em long las mun.

Lidaman bilong sios, Rex Millie Kiagi, i tok em wantaim ol kongriksen bilong Genesis sios i gat bikpela amamas olsem sios we em i op nau.

Na ol man, meri na pikinini i ken pilim fri na welkam tasol long i go na bung long kisim sevis long lotu, felosip na tu ol arapela bung bilong ol konprens, marit o na ol arapela Kristen bung tu.

Ovasis misineri, Reveren Allan Shalm na Suprintenden bilong sios long Papua Niugini, Reveren Richard Carver Junia (long poto) i bin katim riben long opiseli opim Genesis sios.

Intafeit bung long strongim sios wok

TOKTOK wantaim namel long ol sios o “interfaith dialogue” em i bikpela samting, Pop Francis i tok olsem long wokabaut bilong em i go long Sri Lanka long dispela wik, Vatican Redio i ripotim.

Long namba wan de bilong em long Sri Lanka, Pop i bin bungim ol Budis, Hindu, Muslim na ol narapela Kristen lida na toktok strong long ol sios long givim luksave long wanpela narapela na rispektim ol wan wan bilip bilong ol.

Taim em i go kamap long Intanesenl Kongres senta, long kapitel bilong Sri Lanka, ol i bin welkamim Pop Francis wantaim ol tumbuna musik na dram. Na ol Budis, em bikpela sios long Sri Lanka, i bin wokim welkam blesing singsing.

Ol Budis na Muslim lida i bin welkamim Pop na toktok strong olsem i mas gat belisi, wanbel na yuniti long kantri we i stap long wok long 26 krismas nau.



WELKAM LONG SRI LANKA: Wanpela Muslim Sios lida i sekanim Pop Francis long welkamim em long Sri Lanka taim ol narapela sios lida i sanap lukluk i stap. *Poto: Intanet*

Wanpela Muslim lida i bin toktok long ol lain ol bin yusim nem Muslim na kilim ol long Frans, tasol em i tok “Islam i no gat wok long dispela no gut samting”.

Long ol spirituel lida i bung long hap, Pop Francis i bin tok “interfaith dialogue o toktok namel long olwan wan sios i mas

stap wantaim tras na luksave long bilip bilong ol wan wan sios.

Em i tok dispela bai helpim long lukim gut ol samting we yumi olgeta i bilip long en.

Em i tok wok pren na wok bung namel long ol sios i gat bikpela nid long Sri Lanka we i laikim hiling, yuniti na i no pait

na bruk bruk pasin.

Pop Francis i bin mekim wokabaut i go long Filipins, em dispela kantri long Esia we I gat bikpela Katolik populesen stret, na pinisim long Sri Lanka bipo em i go bek long Vatikan.

Stori na poto i kam long Intanet



KATIM LONG OPIM: Ovasis misineri, Reveren Allan Shalm na Suprintenden bilong sios long Papua Niugini, Reveren Richard Carver Junia (long poto) i bin katim riben long opiseli opim Genesis sios. *Poto: Sape Metta*

OL UPNG sumatin soim kalsa bilong Enga Provins

Joylyne Karato UPNG
Sumatin i raitim

OL sumatin bilong Enga long Yunivesiti bilong Papua Niugini i bin bilas gut na kalap kalap long taim bilong tingim bek de we ol Westen Hailans i givim nem Enga long provins bilong ol.

Enga Provins em wampela narakain provins stret we ol i gat wampela tok ples tasol bilong olgeta pipel insait long 5-pela distrik.

Long kain taim bilong ol bikipela bung olsem, ol i save wanbel na bung wantaim na pasim tingting na go het tasol we ol i save kamap olsem brata tru.

Na tu, long dispela ples ol i kolim Enga bai yu lukim ol man i save tok em ples bilong pait. Tru pait i save kirap long dispela brata pasin we narapela



Bilas bilong Wabag sentral, Pogera na Kandep distrik.



Bilas bilong Wapenamanda na Kompam distrik.

bai i no inap stap nating sapos wampela birua i bungim ol. Ol i gat dispela pasin bilong sori na helpim sapos pait i kirap.

Tasol nau Eksen Gavana bilong ol, Pita Ipatas i baim skul fi bilong ol sumatin long ol i ken kisim save na apim gen nem bi-

long Enga.

Lukim ol bikipela saveman na meri long yunivesiti i bilas na soim olsem ol i joinim han pinis

long senisim sindaun bilong komyuniti na kirapim tumbuna kalsa na tredisen wantaim wanem save ol i kisim.

Lukaut long nupela kalsa grup long Siwai

Veronica Hatutasi i
raitim

WANPELA kalsa grup long Siwai i soim nupela na naispela stail bilas, na i wok long kamap strong na go pilai long ol narapela hap bilong Atonomas Bogenvil Rijon (ARoB).

Momoraka Kalsa Grup (MCG) bilong ples Toitoi long Korikunu eria, Siwai, ARoB em dispela grup i soim nupela na naispela kain bilas na wokim ol tumbuna singsing na danis taim ol i winim mambu na danis wantaim ol spia na banara.

Pastaim long lukim dispela kain bilas em taim Praim Minista, Peter O'Neill, na delegesen bilong em i bin mekim wampela raun i go long olgeta hap bilong ARoB long las yia Januari.

Delegesen i bin go long Buin, saut Bogenvil, na MCG i bin wampela long ol tumbuna danis na singsing grup we i bin welkamim praim minista, na i pulim ai bilong planti lain stret.

Long pasim skul yia long Monoitu Praimeri skul long mun Disemba las yia, skul i bin kisim MCG long mekim pilai bilong ol long greduesen seremoni bilong ol Gret 8 na tu, long taim ol i givim ol prais long ol sumatin i wokim gut long skul.

MCG i bin kisim ol Gret



8 na ol narapela gret i go insait long ples we seremoni i kamap, na ol i bin wokim gut stret.

Nupela bilas em ol yangpela man i wokim ol droing wantaim waitpela pen (paint) long skin bilong ol we i stat long lek i go antap long bodi na pinis long pes. Na ol i putim wampela kain naispela longpela het bilas long het na gras bilong ol.

Man, dispela ol yangpela mangki i no isi! Ol i samsam i no isi wantaim ol banara, hatim long winim mambu na singsing na danis na mekim ol manmeri na pikinini i amamas gut tru.

Dispela kalsa grup i gat gutpela sans long go long planti hap bilong ailan na nem bilong ol i wok long kamap strong nau long Siwai.





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Ol i kukim wanpela PNG meri

bilang painim husat tru i bin kilim dispela yangprla mama.

Tasol Mista Basil i tok, lo na oda long kantri em i bagarap olgeta na dispela hevi i stap nau long han bilong gavman long stretim.

Philma Kelagai, husat i bin staitim Leniata Legacy, wanpela grup long Australia em i save mekim awenes long stopim vailans egensim ol meri long PNG i tokaut tu long ol kain kain pasin bilong kilim dai meri olsem i save kamap planti taim long PNG.

Bogenvil i skelim tingting

Bogenvil i kamap nau long taim long ol toktok long sait long sapos em bai bruk lusim Papua Niugini o nogat.

Aropa Airport long Kieta i op gen bihain long 24 yia i wanpela mak i soim olsem Bogenvil i redi long vot long independens long PNG.

Wanpela meri lida long Atonomas rijon bilong Bogenvil i tok, em i bilip ol pipel bilong Bogenvil i redi long vot bilong painim sapos ol bai bruk lusim PNG o nogat.

Helen Hakena i mekim dispela toktok long wanem dispela yia 2015 i stat tru bilong wokabaut na wok redi bilong independens vot.

Aninit long ol tok orait bilong Bougainville Peace Agreement bai ol i mas holim dispela referendum vot namel long 2015 na 2020.

Toktok blong Misis Hakena, dairekta bilong Leitana Nehan Developmen Egensi i kamap tu long wankain taim we Presiden John Momis i tokaut olsem bai ol i kirapim wanpela Bogenvil Referendum opis.

Wok long muvim Haus sik long Honiara

Wanpela komiti blong gavman i nau wok long lukluk long muvim Nesenel Referral Hospital bilong Solomon Ailan i go long narapela hap bilong Honiara.

Dokta Aaron Oritaimae, siaman bilong komiti bilong bildim nupela haus sik i tok dispela haus sik i stap klostu tumas long solwara na ol i pret long bikpela solwara i ken karamapim.

Dokta Oritaimae i tok wanpela hap bilong dispela hospital i stap long mak bilong 4-point-3 mita tasol long solwara.

Em i tok planti taim pinis long taim nogut bipo, ol i bin muvim ol sik pipel go long wanpela haus bilong gavman antap long maunten.

Dokta Oritaimae i tok wari blong solwara bai kamap long haus sik i samting ol i save wari long en olgeta taim long taim bilong saiklon.

Wanpela ples ol i bin tingting long bildim nupela haus sik long en nau em long wanpela hil antap long Panatina long Is Honiara.

PNG bai bungim hevi long ol teroris klostu

Bosman bipo bilong PNG Difens Fos i tok ol boda wantaim Indonesia i op nating na em bai isi long ol teroris i kam insait na kamapim trabel.

Komanda bipo bilong PNG Difens Fos, Jeneral Jerry Singirok i bin toktok wantem ABC na em i tok ol teroris lain bilong ol narapela kantri bai painim isi tru long kam insait long Papua Niugini na kamapim bikpela trabel long wanem PNG i no gat strongpla sekyuriti long bodamak bilong en wantaim Indonesia.

Mista Singirok, i mekim dispela toktok bihain long Indonesia gavman i tokaut olsem planti pipel i wok long bringim hait ol samting lusim PNG i go insait long Indonesia.

Long dispela taim PNG i no putim ol sekyuriti fos long lukautim ol boda olsem long Sandaun provins, na tu long Western Provins.

Dispela i save mekim i isi tru long ol pipel i bringim hait ol gan, ol pipel yet na tu ol i save stilim ol pis, bislama lusim PNG na karim i go long Indonesia.

PNG Gavman i mas stopim pasin bilong posin sanguma

Sampela Non gavman (NGO) lain long Papua Niugini i askim gavman long givim moa sapat long stopim o daunim vailans i

save kamap bihainim pasin sanguma na posin.

Ol i kukim wanpela yangpela PNG meri em ol i bin sutim tok long en olsem em i sanguma meri. Caroline Tiriman bilong ABC i bin ripot long askim bilong ol NGO grup long PNG long dispela bikpela hevi.

Wanpela grup em ol i kolim 'Stop Sorcery Violence PNG' i mekim dispela askim long wanem planti mama, lapun meri na ol yangpela meri i save dai nating long wanem ol lain i sutim tok olsem ol i save mekim posin long ol arapela.

Eriko Fufurefa, husat i go pas long dispela grup long Isten Hailans i tok dispela kain vailans i wok long kamapim bikpela hevi tru long PNG.

Long PNG, long wan wan yia bai yumi harim stori long ol i kilim ol pipel na planti long ol em ol lapun meri long wanem ol i sutim tok long ol olsem ol i posin meri.

Planti long ol dispela kain vailans i save kamap long Hailans rijon olsem na ol meri i kirapim ol grup bilong ol yet long daunim dispela kain pasin. Tasol ol i tok ol i laikim gavman long wokbung wantaim ol na stretim dispela hevi.

Eriko Fufurefa, kodineta bilong 'Stop Sorcery Violence PNG' grup long Isten Hailans i tok Oxfam Australia i helpim wok bilong ol nau tasol ol i laikim gavman tu long helpim ol.

Nau PNG gavman i gat lo long kilim ol pipel husat i save kilim nating ol narapela. Tasol Pastor Jack Urame wanpela risetsa long Melanesian Institute long Goroka, i tok em i no wanbel tumas long

dispela lo.

Narapela ples we ol i save kilim nating ol pipel long dispela pasin sanguma em long Autonomas Rijon bilong Bogenvil, Helen Hakena, siameri bilong Human Rights grup long Buka i tok gavman na ol sios i mas wokbung na sanap strong wantaim long daunim displea wari.

Taim nogut long PNG Solomon Ailan na Vanuatu

Wanpela tropikel dipresen o taim nogut we i bin stap long Solomon Ailan insait long wanpela wik i go pinis i wok long givim wari tu long Papua Niugini na Vanuatu.

Bikpela ren, strongpela win na taim nogut long Pasifik rijon.

Papua Niugini Meterolojikel Sevis i bin tokaut long strongpela win long solwara long Papua stat long Daru Westen provins i go inap long Milen Be.

Dairekta bilong PNG Met Sevis Sam Maiha i tok dispela taim nogut i kam long tupela tropikel sistim.

Em i tok bikpela wari long PNG nau em long dispela tropical depression we ibin stap long Solomon Islands na i nau lusim ol.

Mista Maiha i tok dispela sistim i wok long bringim planti ren we i gutpela long Pot Mosbi we i nidim ren, tasol em inap bagarapim tu sampela hap we bikpela developmen i stap long en.

Dispela tropikel dipresen i bin wok long bringim bikpela ren na taim nogut long sampela hap

bilang Solomon Ailan insait long wanpela wik i go pinis nau i lusim kantri.

Na Dairekta bilong Solomon Ailan Meterolojikel Sevis, David Hiriasia i tok ol i stopim wanpela Tropical Disturbances Watch Advice we ol i bin givim aut.

Tasol em i tok dispela tok lukaut long bikpela ren long sampela hap bilong Solomon Ailan i stap yet.

Long wankain taim, Vanuatu Meterolojikel Sevis i wok long putim was gut long dispela taim nogut i bin lusim Solomon Ailan.

Tom Natick husat i Lead Forecaster wantaim Vanuatu Met Sevis i tok bai planti ren i pun-daun long kantri.

Stretim hariap ol dai long taim bilong Krismas na Nu Yia

Papua Niugini Oposisen i tokaut strong long gavman i mas stretim hariap dai bilong wanpela meri long Nu Yia.

Deputi Oposisen lida Sam Basil na lida Don i askim strong gavman long hariap na stretim bikpela wari bilong lo na oda long Lae.

Sam Basil i mekim dispela tok-tok bihain long Polis Komisina Geoffrey Vaki i bin givim oda long wanprla wok painimaut i mas kamap long dai bilong yangpela mama Moana Pisimi, long Nu Yia.

Ol i sutim tok long polis na ol sekyuriti gad long sutim dai dispela meri.

Polis Komisina Geoffrey Vaki i tok promis long mekim olgeta wok



PNG Pawa het opis long, Hohola, Pot Mosbi.

Gavman i mas was gut long bisnis bilong ol pipel (SOE)

Stanley Nondol i raitim

WOK bilong gavman em long menesim o was gut long ol bisnis bilong ol pipel - Stet On Entaprais (SOE) na i no bilong salim long ol praivet kampani taim bisnis i no mekim inap winmani.

Ol memba bilong Oposisen sait i gat bikpela wari na pret long gavman i tokaut na i laik salim ol bisnis bilong pipel i go long ol praivet kampani.

Lida bilong Oposisen, Don Polye na namba tu bilong em, Sam Basil i mekim bikpela singaut long gavman long i no ken salim bisnis bilong pipel. Tasol tupela i singaut long gavman i mas menesim gut long ol SOE i mas mekim winmani na sapotim baset bilong kantri.

Mista Basil na Polye i mekim dispela singaut bihain long gavman i tokaut olsem ol polis na PNG Difens Fos bai go raun na kisim pawa bilong ol kastoma husat i no bin baim pawa aninit long wanpela Stet Ov Imejensi we gavman i tokaut long las wik.

Ol bisnis bilong pipel gavman i save menesim aninit long Independen Pablik Bisnis Kopresen (IPBC) em; PNG Pawa, Telikom, Eda Ranu, Water PNG, B Mobile, Air Niugini, Nesanel Developmen Benk, Nesanel Petroleum Kampani Projek (NPCP) na sampela moa.

Gavman i tokaut pinis long salim 50 pesen bilong PNG Pawa i go long ol praivet kampani. Na i tokaut tu long salim bikpela balus kampani, Air Niugini long 50 pesen.

Gavman i tok em bai salim bisnis bilong ol pipel long ol praivet kampani long ol i ken mekim inap mani long sapo-

tim kantri.

Tasol Oposisen na sampela saveman i tok dispela tingting bilong gavman i no stret bikos em bisnis bilong 7 milien pipel bilong kantri na gavman i mas menesim gut.

Oposisen lida bipo Belden Namah i tok i gat bikpela rot long ol bisnis bilong gavman bai mekim bikpela winmani tasol gavman i no menesim gut.

Mista Namah i tok gavman i mas putim ol gutpela man i gat save na eksperiens long menesim gut na putim bikpela mani long baset long stretim na ol SOE i ken mekim inap mani.

Em i tok ol bisnis bilong gavman i save pundaun o i no mekim inap mani taim gavman i makim ol wantok bilong ol long politiks long kamap bos long na ol i no save menesim gut.

Mista Namah i tok planti bilong ol wantok i ol i makim i no gat save long menesim na i save paulim mani na aset long pasin korapsen. Na taim bisnis i pundaun o i no mekim winmani, gavman i save tok em bai salim long praivet bisnis bikos kampani i no mekim mani long sanap strong.

Oposisen lida, Don Polye i tok rot gavman i kamap wantaim Stet ov Imejensi em i no stret aninit long lo bilong kantri.

Mista Polye i tok gavman i gat hait plen na giaman long kolim Stet ov Imejensi long em bai salim PNG Pawa long ol wantok bihain long dispela.

Gavman i tokaut olsem Polis Fos na PNG Difens Fos bai raun na kisim pawa bilong sampela milien i kam long akaun bilong PNG Pawa.



SMART ENERGY

COMING SOON!

A LIMITED STOCK OFFER COMING SOON

- LIFE MADE EASIER
- Renewable energy for lighting
- Cleaner energy for cooking
- Convenient energy for phone charging

Welcome to SMART ENERGY!

A convenient and affordable way to Live Smart, Cook Smart and Talk Smart.

Original Energy from the sun... Life made easier



LPGas... Life made easier





WATCH THIS SPACE FOR ONGOING PROMOTION FOR THIS PRODUCT.

Stretim ol lo i lukautim ol bot na liklik sip



Klostu olgeta mun, i save gat ripot bilong ol liklik bot o moto kanu i lus long solwara na ol pasindia i dai.

Olgeta ples long nambis na ailan long PNG i gat stori bilong ol long dispela birua long solwara. Sampela taim ol i painim ol dispela lain, tasol planti taim i no gat.

Bihain long planti kain birua olsem i kamap, i no gat wanpela kot o wok painimaut i kamap long painim as bilong hevi. Ol pipel bai tok ol lain ya painim taim nogut long solwara na ol i lus.

Long mun Desemba i kam inap long dispela nupela yia 2015, i bin gat planti ripot bilong ol bot i lus long solwara.

Sampela i laki na ol i painim ol, tasol sampela i lus olgeta. Long dispela wik yumi harim stori bilong 11-pela pipel husat i bin kalap long wanpela banana bot long Manus na i go long Madang.

Fiul long bot i pinis na ol i drip i go long wes na kamap long hap bilong Wes Nu Briten. Ol i laki olsem tupela i swim i go sua na ol arapela 9-pela em balus bilong Australia i lukim na tok save we wanpela sip i go painim na kisim ol.

I bin gat tu ripot bilong wanpela man i lus long solwara long hap bilong Westen provins. Ol i go baim buai long Galp provins na i laik go bek na ol i bungim taim nogut long solwara.

Long Mosbi i bin gat ripot bilong long tupela man i lus long taim bot bilong ol i kapsait. Ol i bin ran long ples Papa long Sentral provins i go long Pari long taim dispela birua i kamap.

Ol taim opis bilong Nesenel Maritaim na Sefti Atoriti i save givim tok lukaut long ol manmeri na papa

bilong ol banana bot long putim yau long redio o yusim het bilong ol na skelim sapos i orait long kalap long bot o nogat.

Ol provinsal redio stesin na televisen stesin tu i save putim tok save bilong san, ren na win na tait bilong solwara.

Ol lain bilong nambis i save olsem namel long mun Desemba i go inap long Mas, em i taim bilong ren na strongpela win na solwara i save solap na bikpela si i save kirap.

Ol i save olsem dispela taim em i no seif tumas long ran long kanu o bot i go long ol longwe ples. Sapos ol i mas kalap long kanu, bai ol i bihainim arere bilong nam-

bis tasol i go kamap long wanem ples ol i laik go long en. Na sapos ol i lukim olsem win i strong na si i bikpela tumas bai ol i go sua na wet inap ren na win i pinis na solwara i orait gen.

Tude, i gat planti ol skipa bilong bot husat i save ting olsem ol i save moa long ranim bot na i no wari tumas long laip bilong ol pasindia.

Bot bilong ol em i olsem PMV bilong solwara na mani em i bosim tingting bilong ol. Ol pipel tu i no gat narapela rot long go long wanem ples ol i laik go long ol, olsem na ol i kalap tasol long ol dispela banana bot. Ol bot i gat 40 hospawa i orait, tasol sapos

bensin i pinis namel long solwara bai ol i painim taim. Planti taim i no gat ol samting bilong helpim pasindia i stap long ol dispela banana bot bikos i no gat lo i save bosim ran bilong ol.

Yumi go insait nau long 2015, na long dispela taim long ol arapela hap long wol i gat gutpela teknoloji bilong helpim ol lain i ran long ol liklik bot.

I gat gutpela rot bilong sekap long ol bot na rot bilong yusim telekomyunikesen sapos i gat hevi i kamap. Ating hia long PNG tu ol provins i stap long nambis i mas toktok strong long gavman i strongim ol lo na helpim ol pipel husat i save yusim ol banana bot

na ol liklik bot long go i kam long ples bilong ol.

Transpot bilong wara em i wanpela eria we gavman i no givim luksave long en olsem na ol pipel yet i yusim strong na save bilong ol.

I gat pinis ol program bilong Nesenel Maritaim na Sefti Aoriti i stap long helpim ol pipel. Tasol i mas gat moa wok na sapot i kamap long helpim ol pipel bilong yumi husat i save strong long transpot bilong wara long laip bilong ol.

Em i no stret sapos yumi wok long lukluk tasol na moa pipel i wok long lus long solwara long olgeta yia.

Nogut Stet ov Emejensi kamap long olgeta gavman bisnis



Gavman i kamapim wanpela strongpela operesen ol kolim Stet ov Emejensi long sasim ol lain i yusim pawa nating na i no save baim pawa bilong ol longpela taim i kam nau. Sapos yu husat lain save mekim hait ol giaman na hait pasin long stilim pawa na no save baim pawa bil, yu mas lukaut bikos nau em ol ami na polis tu bai kam long haus na banis bilong yu na mekim yu sotwin stret.

Em nupela lo gavman i kamapim na Minista bilong Pablik Entaprais na Stet Investmen Ben Micah i go pas long traim pulim mani bilong PNG Power i kam bek we rekot i soim olsem moa long K130 milien i lus nating long pawa bil na ol hait pawa saplai.

Dispela operesen gavman i kamapim bai wanpela lain bai go pas long en we i kam aninit long wanpela kontrola em olpela ami Sif ov Staf Kepten Tom Ur.

Bipo gavman save yusim ol polis na ami long ol bikpela hevi insait long kantri olsem graun bruk na bagarapim ples, bikpela tait wara na solwara

bagarapim ples, guria na ol arapela bikpela bagarap we ol pipel i kisim bagarap. Narapela tu em gavman yusim ol ami long bikpela hevi olsem bikpela pait planti haus na laif bilong ol manmeri i lus na pait i go bikpela moa we no gat man bai harim tok o lusim pait. Narapela tu em long taim bikpela pret long kantri bikos sampela ausait hevi i laik kamap long bagarapim sindaun bilong ol pipel na kantri. Tasol nau em gavman yusim polis na ami long hevi bilong em yet long mekim mani long wanpela bisnis han bilong em.

Dispela i soim olsem sapos yumi pablik i no peim ol bil na takis bilong yumi go long gavman bai ol polis na ami i kam sekim yumi. Sapos yu laik egensim gavman bikos em i no mekim samting stret long laik bilong yumi bai polis na

ami i stopim yumi. Em ol sampela piksa gavman i yusim ol polis na ami nau long mekim na ol inap mekim planti moa long bihain sapos gavman i kamapim Stet ov Emejensi long ol arapela wok na bisnis bilong em.

Stet ov Emejensi long mekim mani bilong PNG Power i soim stret olsem gavman i no gat bilip moa long menesmen na operesen bilong PNG Power. Bikos yumi save olsem long kisim mani na bil bilong pawa em wok bilong PNG Power we i gat seksen bilong dispela na i gat ol wok manmeri bilong em i stap.


Ating ol save pret long go kisim pawa bil long sampela haus na ol bisnis haus o ating ol save kisim hait mani (braiberi) na larim ol dispela lain i stap o ating ol PNG Power wokman yet save mekim ol dispela hait koneksen bilong ol dispela bisnis haus. Taim kain samting olsem i save kamap, tru tumas ol menesmen bai i no inap save bikos em hait pasin we wokman save pinis long wok long mekim.

Taim wanpela haus o bisnis i no peim pawa bil longpela taim, orait katim menesmen ken mekim disisen long katim pawa. Sapos ol i hait na pulim pawa (ilgol konkesen) orait katim pawa na no ken givim pawa moa long ol.

Em menesmen disisen wantaim ol wokman bilong em na i no bilong bikpela Minista na gavman long kam daun long wok bilong ol operesen lain.

A ting PNG Power menesmen i no askim gavman long kamapim dispela Stet ov Emejensi long wok bilong em olsem na sapos gavman yet i mekim dispela, no gut bai em kamapim Stet ov Emejensi long Telikom long kisim ol telefon bil na hait koneksen, Lens Dipatmen long kisim ol rent mani bilong graun, IRC long kisim ol takis mani long ol bisnis na ol lain i no save peim takis hariap na ol arapela gavman bisnis tu.

I no longtaim bai Stet ov Emejensi kamap long olgeta hap bilong Papua Niugini em nau bai polis na ami kam long haus dua bilong yumi.



Kuk long ges haus i gutpela sans long wok

Veronica Hatutasi i raitim

KUK na salim ol samting o kamap kuk na redim ol kaikai long ges haus long taun o ples i kamapim sans long ol mama na yangpela meri long wok na kisim mani long en.

Wantok ripota i bin stap long malolo long ples Siwai, saut wes Bogenvil na bungim sampela mama na ol yangpela meri bilong ples Hire klostu long Monoitu Misin stesin i wok long redim ol kaikai long ol manmeri i bin sindaun long wanpela woksop na slip long Wilmo Ges Haus.

Ol dispela mama na yangpela meri i amamas long dispela wok na taim sans olsem woksop o ol lain i kam stap long Wilmo GesHaus, ol i no save larim sans i go nating, no gat.

Ol i save wok strong long lukim olsem i mas gat inap kaikai long kukim long ol na ol woksop lain long moning, belo taim, ti taim na long nait.

Poto i soim ol meri Hire i redi long sevim ol kaikai na wanpela sospen i sindaun yet long paia.

Poto: Veronica Hatutasi

Siwai basket i helpim planti mama

Veronica Hatutasi i raitim



WOKIM basket na salim nau i kamap olsem wanpela rot long ol meri mekim mani long en na lukautim ol yet na ol famili bilong ol.

Dispela ol basket ol i wokim long ol lip kokonas, karuka, wail banana, ol rop long bus na narapela plent i save gro long arere bilong wara.

Siwai long Saut wes Bogenvil i wanpela eria we ol mama na meri i save mekim ol kain kain basket long salim.

Ol meri i kisim ol nupela tingting taim ol i raun long ol arapela hap bilong Bogenvil na Buka na lukim ol kain stail long ol basket samting na ol i wokim ol nupela, naispela moa na strongpela basket long salim.

Ol wok meri, ol tisa na ol nes em ol bikpela kastoma long ol dispela basket bikos ol (basket) em ol rait sais long putim ol samting bilong wok long ol.

Wantok ripota i bin raun i go long ples long mun Disemba nae m i bin painim wanpela kain basket na givim mani long wanpela kasen bilong em long baim long wanpela meri long ples Tohu i save wokim ol

STAIL SIWAI BASKET: Bianca (long fran) na Kirsty (baksait) wantaim ol narapela kasen olsem Ebony, Soina na Darrel bilong ples Monoitu long Siwai i promotim na soim ol stail "haki" basket planti wokmeri long Bogenvil i laikim na yusim. Poto: Veronica Hatutasi

basket.

Tasol kasen i bin painim olsem las tupela tasol i stap bikos ol tisa long Tonu Haiskul i bin baim na pinisim planti ol basket long kisim i go olsem ol presen long ol ples bilong ol long ol narapela hap bilong Bogenvil na PNG, taim ol i go long Krismas skul malolo.

Wantok ripota i lukim kain nupela stail basket bilong nau ol i kolim long "haki" i naispela na strongpela moa. Na planti wok meri long olgeta hap bilong Bogenvil i wok long Buka

na Arawa i wok long yusim ol dispela kain basket long taim bilong wok, i go long maket na ol stua tu.

Long Buka na Arawa maket, bai yu lukim ol meri na mama Siwai i salim ol kain basket ol i kolim long "karaigi" we ol i wokim long lip kokonas ol i daim o penim, "haki" olsem dispela long poto na narapela ol i wokim long rop vain.

Tasol nupela taim, nupela tingting ol meri i kisim taim ol i raun em ol i yusim long wokim ol nupela stail basket.



Ombudsmen Komisen bilong Papua Niugini

Lukluk long ol lo bilong Komisen

Pablik Tok Save

Ombudsmen Komisen i toksave long general public olsem em i wok long givim out wanpla Diskasen Pepa long kisim tingting bilong ol manmeri long ol lo em i bihainim long mekim wok bilong en.

Dispela pepa i kam wantaim ol askim long halivim Komisen long mekim gut wok bilong en. Ol tingting bilong yu long dispela pepa bai halivim Komisen long mekim senis long ol lo bilong en.

Yu ken kam long hed ofis bilong mipela long Deloitte Tower, Port Moresby o long ol regional ofis bilong mipela long Mt Hagen, Lae na Kokopo long kisim Diskasen Pepa.

Ol manmeri i laik givim tingting bilong ol i ken rait i kam long;

Ombudsman Commission PNG

P.O Box 1831

PORT MORESBY

NCD

O salim email i kam long legreview@ombudsman.gov.pg

Dedlain bilong dispela em 30/01/2015. Long kisim moa toksave ringim Legislative Review Coordinator long 308 2635 or 308 2600.

Authorised by:

Joseph Molita

Secretary to the Commission

Pasifik Gems Rilei bai raunim 22 provins

SAMTING olsem 70 de i stap yet long Pasifik Gems Rilei i statim ron bilong em go insait long olgeta 22 provins long Papua Niugini.

Dispela rilei ron i wok long go gut long ol plen we ol Pasifik Gems Rilei tim i stretim pinis ol plen bilong statim ron long mun Mas.

Ol lain long dispela rilei i askim tu ol wan wan manmeri bilong PNG long tokaut sapos ol laikim dispela ron ken go insait long ples na eria bilong ol tu we ol i gat spesel interes long dispela.

Menesa bilong Gems Rilei Tamzin Wardley i tokaut olsem bikpela as tingting em ol laikim planti manmeri mas stap insait long dispela.

Mipela laikim planti manmeri long stap insait long dispela rilei. Ol lain husat laikim ron i go long hap bilong ol tu ken stap insait na ran olsem ol volentia o stap sambai taim ran i kam olsem long provins, taun na ples bilong ol long sapatim dispela ran i kamap gut na go long narapela provins gen.

Mipela laikim ol lain mas givim nem bilong ol ples na

hap ol i ting i gat sampela mining long ol long dispela ran ken kam long dispela hap bilong ol bai ol provinsel opisel bilong mipela ken stretim plen na ol samting. Wanem toktok em yupela ken mekim toktok long twitter hashtag#raunimpng.

Dispela rilei ran em olsem piksa bilong ol pipel bilong PNG olsem na mipela laikim olgeta spot manmeri bilong wanwan provins long stap insait. Ol gat nem long spot long bipo o ol gat nem long sampela wok long komyuniti em ol mas stap insait long

dispela ran, Wardley i tok.

Em tok olsem, "dispela rilei em hap bilong Pasifik Gems we ol pipel bilong yumi long ol ples ken stap insait tu olsem na mipela laikim ol mas gat dispela sans long stap insait long dispela rilei ran.

Pasifik Gems Rilei bai stat long 26 Mas 2015 na bai raunim olgeta 22 provins long PNG insait long 100 dei. Dispela Rilei bai pinis long taim bilong opim stretim Pasifik Gems long Mosbi long Julai 4, 2015.

Minista laikim ol etlits redim ol yet gut

GUTPELA tru long lukim planti spot manmeri na ol menesmen i bung wantaim na serim ol tingting na save bilong ol long wanwan gems na spot ol stap insait long en.

Minista bilong Spot Justin Tkatchenko na Tim PNG Sif de Misin long Pasifik Gems long dispela yia Richard Kassman i mekim ol dispela toktok long ol spot manmeri long las wiken long Mosbi.

Minista i kirapim bel bilong ol spot manmeri long lukluk stret long trening bilong ol na redim ol gut long bikpela gem bai i kam.

"No ken wari long ol arapela samting bilong menesmen na edministresen. Wanbel long yu yet na stap strong long trening bilong yu," em i tok.

Minista i tok em luksave long pikinini meri bilong em husat tu i wok long trening hat long stap insait long fainel PNG skwat bilong Gems na em klia long wanem samting ol spot manmeri wok long mekim nau long redim ol yet long ol gems bilong ol.

"Tingting stret na wok hat long en bikos no gat man bai givim samting isi long yu long golden plet. Yu mas kisim long hatwok bilong yu yet we yu makim na kam long en long kisim, Tkatchenko i tok.

Em tok planti spot lain save makim kantri bilong ol tasol olgeta i no save gat sans long pilai long ai bilong ol pipel bilong ol stret.

"Olsem na dispela em bikpela sans tru na dispela i no inap kamap gen," Minista



Minista bilong Spot, Justin Tkatchenko.

i tok.

Wankain tu Mista Kassman i tromoi sampela rul long tim bilong em olsem em laikim gutpela na stretpela pasin long olgeta spot manmeri long dispela taim.

"Mi no laik lukim yupela kaikai buai, smok na spak o singaut na mekim kainkain pasin olsem ol raskol," em i tok.

Em tok strong tu long pasin bilong aigris na pasin paol. Em tok ol man na meri mas gat moa rispek long narapela narapela na famili bilong ol.

Em i tok dispela em ol liklik samting long bihainim tasol long ai bilong kantri em bikpela samting long Tim na gutpela risal bilong winim ol gem.

Em tok tenkyu long olgeta spot manmeri long kamap na ol ken wok strong long redim ol yet long nau inap long taim bilong Pasifik Gems we 5-pela mun i stap yet.



Tim Veli Bleks i kisim grup poto long ap taim long Hohola las wiken Sande. Poto Joylyne Karato

PNG Hunters wok long kisim luksave

OL NRL klap long Australia i wok long kisim ol PNG Hunters pilaias nau na dispela em gutpela nius long PNG.

Sif Eksekjutiv Opisa (CEO) bilong PNG Hunters Brad Tassell i tokaut long dispela wik taim tripela PNG Hunters pilaiia (Wartovo Puari, Thompson Teteh na Stanton Albert) bai i go joinim ol NRL klap long dispela yia. Dispela nius i kamap antap long sainim bilong Mark Mexico long NRL na bihain tasol em go long Inglis klap Gateshead Thunder long Inglan.

"Em wanpela bikpela gol bilong SP PNG Hunters long kamapim geit bilong ol PNG Pilaiia. Ol tripela pilaiia gat rait long dispela sans bilong ol na bikpela amamas go long ol kosa na menesmen na gem bilong tim long las yia we i givim dispela bikpela sans tru long ol tripela pilaiias ya," Tassell i tok.

Tassell i tok menesmen bilong Hunters na ol kosing



Wanpela gem bilong Hunters egensim Mackey Cutters long las yia sisen salens long Kwinslen Australia.

staf i wok hat tru long traim kamapim wok poroman wantaim ol NRL kosa na klap opisel.

"Bikpela samting mipela tokim ol pilaiia em long wanbel na stap isi. Mipela givim bikpela taim na strong long redim gut ol pilaiias bilong mipela na mipela lukim olsem ol i kamapim gutpela mak na developmen level na ol inap kamap gut taim ol gat bikpela sans olsem," Tassell i tok.

Em mekim bikpela tok

tenkyu go tu long Minista bilong Spot, Justin Tkatchenko long bikpela sapat bilong em long Hunters.

"Minista bilong Spot i sapatim wantaim K10,000 long wanwan pilaiia husat go long Saut Sydney we mani ya inap helpim ol long 6-pela wik we dispela kain sapat save mekim planti samting i kamap isi long mekim wantaim ol NRL klap long kisim ol pilaiias bilong mipela," Tassell i tok.

PNG Hunters skwat bilong 2015

- | | |
|-----------|----------|
| Adex | Wera |
| Adam | Korave |
| Brandy | Peter |
| Edward | Goma |
| Esau | Siune |
| George | Benson |
| Israel | Eliab |
| Lawrence | Tu'u |
| Noel | Zemming |
| Roger | Laka |
| Sebastine | Pandia |
| Timothy | Lomai |
| William | Minoga |
| Kato | Ottio |
| Ase | Boas |
| Stargoth | Amean |
| Warren | Glare |
| Philemon | Kimisive |
| Henry | Wan |
| David | Lapua |
| Atte Bina | Wabo |
| Jay Jay | Garrison |
| Bland | Abavu |
| Enock | Maki |
| Wartove | Puara |
| Thompson | Teteh |

Nupela senis bilong Ipatas Kap

Joylyne Karato UPNG Sumatin i raitim

BIKPELA ragbi gem bilong kantri, Ipatas Coca Cola kap i stat las wiken na i bihainim wanpela nupela senis o fomet we ol tim Morobe i pilai long Wau.

Bipo olgeta rijon i save pilai 3-pela de kompetisen we ol i save pilai long Fraide, Sarere na Sande we ol i save makim ol top foapela tim.

Tasol nau ol i kamapim dispela nupela fomet we ol i ken pilai long tripela wiken we ol i bai pilai tupela de tasol, Sarere na Sande.

Las wiken ol Wau Noten Lek i bin pilai long Wau we mamba bilong ol Sam Basil, i bin givim mani inqp long mak bilong K30,000.

Komisina bilong Ipatas Kap, Mal Taime i tok pilai bilong 2015 i bin stat long Wau long wanem em i mama graun bilong dispela gem ol i kolim ragbi tas long

PNG we ol i bin statim long yia 1962.

Na tu, em i tok em i amamas long ol man na meri o sapota na tu ol pilaiia long pilai gut na stap gut long mekim las wiken gem i go kamap gut.

Bihain long dispela bai ol Simbu salens bai kik ov wantaim ol SineSine Yongo Bradas husat holim taitel i stap nau.

Long pinis bilong dispela mun, bai ol Westen Hailans na Jiwakai i pilai. Enga, Sauten Hailans na Hela bai pilai long namba tu mun na ol NCD na Sentral bai pilai long Sogeri.

Gren fainal bai kamap long Enga long Aipus pilai graun we wina tim bai kisim sil bilong 2015. Prais mani bilong dispela gem bai K100,00 we wina bai kisim K50,000 na tim husat i kam namba tu bai winim K30,000 namba tri bai kisim K20,000 na las bai kisim K10,000.

PNG bai stretim medikol sevis bilong 2015 Pasifik Gems

Ol wok redi i kamap long bikpela 2015 Pasifik Gems we em bai stat long Mosbi long Julai 4 na pinis long Julai 18.

Bai moa 3,000 spot man na meri long 24 kantri bai kam pilai long kain kain spot.

Taim ol i pilai na kisim bagarap long namel, ol bai ken nidim helpim long wanem bagarap ol i kisim long dispela taim stret bipo long ol i ken go long bikpela haus sik sapos ol lukim olsem o i no nidim moa helpim.

Long mekim dispela wok, Gems medikol tim i mas gat ol strongpela marasin na tu ol ikwipmen long stretim ol bagarap ol spot man na meri i kisim.

Long givim strongpela medikol sevis long ol, Gems Ogenaising Komiti (GOC) laikim ol saplaia bilong Gems i redim ol strongpela ikwipmen.

GOC Sief Eksekutiv Opisa, Peter Stewart i tok PNG i lukautim dispela bikpela Gem na i mas givim gutpela luksave long ol narapela kantri taim ol i kam stap hia.

Em i tok askim ol medikol ikwipmen na drag saplaia long wok bung wantaim ol long redi long dispela bikpela Gem.

Strongpela NRL fowet bilong 2015

DISPELA em we ol bikpela boi save pilai. I no long sais bilong ol tasol we i mekim fowet pek i save winim gem o strongim tim. Hia em top faiv list we i kamaipm planti toktok pinis long NRL top fowet pek. I gat planti bikpela fowet pek tasol dispela em faivpela ol makim we i gat intanesenel na Stet ov Oriijin eksperiens i stap insait.

Barba werim namba 6 bilong Sharks

HAFBEK bilong Cronulla Jeff Robson i tok laiv waia hafbek Ben Barba bai pilai wankain stail olsem olpela Shark faiveit Todd Carney i save pilai.

Nau bai em pilai olsem nupela faiveit bilong Sharks long taim em bin kamap long klap, Barba i mekim olgeta lain long klap i amamas stret taim em lusim Broncos na go na Robson i tok em i amamas stret long pilai wantaim Barba long dispela yia.

Mipela bai traim long mekim em pilai wankain faiveit stail olsem Toddy. Em narakain pilaia long Carney olsem na mipela mas tingim dispela na wok klostu wantaim em, Robson i tok.

Sapos mipela mekim olsem bai dispela inap

helpim na tu. Taim mipela klia gut long gem bilong mipela bai dispela inap wok gut long tim. Mipela i wok long trening gut i kam bihain long krismas holide na mipela inap kamap gut moa.

"Nau mi wok long klia gut long gem bilong em na ol stail em laikim, mipela inap strongim patnasip bilong mipela long nau go inap long taim gem i stat".

Barba i save gut long pilai long fulbek taim em stat pilai long 2008, em bin pilai long namba 6 jesi wantaim Broncos 9-pela taim we kosa Shane Flanagan i luksave long dispela posisen em ken pilai long en.

Robson i no gat wari lon Barba i kam pilai long namba 6 we em ting stail na

skils bilong Barba bai kamap ples klia we wok bilong em long hapbek bai kamap isi.

Em save gut long toktok wantaim ol pilaia taim em pilaim faiveit na mi save mipela olgeta bai pilai gut wantaim em, Robson i tok.

"Mi mas go pas long tim long mipela mas kisim gutpela posisen taim mipela stap long fil we mi ken join gut wantaim ol arapela olsem Benny na Mick Gordon long beks we tupela gat gutpela stail blong ranim bal."

"Sapos mipela mekim olsem bai mpela givim trabel long planti tim bikos wanpela bikpela samting long Ben em stail bilong em long ranim gem. Em save ron hariap na



Top pilaia Ben Barba bai pilaim faiveit bilong Cronulla Sharks long dispela yia. Em lusim Broncos bihain long wanpela yia kontrak i pinis long las yia.

hat long luksave we em wanpela kain pawa liklik man ya i gat."

Taim ol samting i luk orait long klap, ol sapota bilong Sharks mas wet liklik long lukim dispela patnasip bilong

ol hapbek i kamap klia sapos Robson i inap mekim samting i kamap gut long dispela. Robson i no gat tingting long pilai insait long Oklen Nains salens we Sharks i makim tim long go insait.

Iraksokatimbihain long Saddam Hussein



Planti soka pilaia bilong Irak save dai, kisim bikpela pen na bagarap taim olpela lida bilong kantri Saddam Hussein bin stap. Tasol dispela i no save daunim laikim bilong ol long pilai soka. Dispela yia em namba wan taim ol kambek long wolsoka insait long Esia Soka Salens. Ol lus 4-0 long Australia long las wik na 1-0 long Saut Korea long dispela wik. Nau ol no pret moa olsem bipo. Ol laik kirapim stail na strong bilong soka long Irak na tu stap insait long olgeta soka salens wantaim olgeta kantri long wol.

5. Sharks

Statim Pek: Andrew Fifita, Michael Ennis, Sam Tagataese, Luke Lewis, Wade Graham, Paul Gallen-Cronulla i gat nem long strongpela fowet pek bilong ol na dispela em bikos ol i save kam hat wantaim pawa. Strong bilong Sharks bai go antap moa wantaim olpela Bulldogs dami hap Michael Ennis, husat bai sapatim tru dispela eksperiens fowet pek. Paul Gallen, Luke Lewis na Andrew Fifita em ol fowet bilong Australia long 2013 Wol Kap kempen, na tu ol gat tripela intanesenel fowet long risev olsem; Chris Heighington (Inglan), Anthony Tupou (Australia) na Jayson Bukuya (Fiji). Sam Tagataese husat bin pilaim tes gem bilong Samoa. Olsem na dispela em wanpeal fowet pek ol lain no ken kam isi long ol.

4. Roosters

Statim Pek: Jared Waerea-Hargreaves, Jake Friend, Sam Moa, Boyd Cordner, Mitch Aubusson, Aidan Guerra.

Fowet pek bilong Roosters i bin strong long bipo na ol i no pundaun yet long 2015 maski biknem Sonny Bill Williams lusim na go. Foapela intanesenel bai statim fowet pek na jaek Friend i wok long mekim nois i stap long winim spes insait long Kwinslen and Australia tim.

Waerea-Hargreaves na Moa em tupela strongpela hitmen, na Aidan Guerra na Boyd Cordner em tupela bikpela man tasol stail na futwok bilong tupela em narakain. Ol gat strongpela sapat long sait olsem Martin Kennedy husat i kam bek long joinim Dylan Napa, Isaac Liu na Kane Evans. Dispela em strongpela pek wantaim bikpela eksperiens na strong.

3. Broncos

Statim Pek: Josh McGuire, Andrew McCullough, Adam Blair, Matt Gillett, Sam Thaiday, Corey Parker

Nau ol i kisim Adam Blair i kam long West Tigers, dispela Broncos pek i luk olsem ol i set na redi stret. Kosa Wayne Benneth i tokaut long muvim Corey Parker na Sam Thaiday aut long fran rowa na go bek long olpela posisen bilong tupela long ranim gem wantaim bal na tromoim bal. Dispela em gutpela nius long ol Broncos sapota. Wantaim faivpela intanesenel pilaia na ol bens pilaia olsem Alex Glenn, James Gavet na Corey Oates, dispela emm Broncos pek redi long mekim nois long primiasip taitel long 2015.

2. Rabbitohs

Statim Pek: George Burgess, Issac Luke, Dave Tyrrell, Chris McQueen, John

Sutton, Glenn Stewart.

Dispela sait bin kamapim planti toktok pinis namel long ol NRL sapotas na opis. Dispela pek i bin daunim olgeta lain na kamap long 2014 NRL gren fainel nau i no kisim wanbel tumas long fowet pek bilong dispela yia. Ating semption fowet Sam Burgess husat bin winim Clive Churchill Medol i no stap moa tasol no ken luk daun yet long ol. Nupela rikrut olsem Glenn Stewart bai putim sampela pawa go antap long sait bilong pamim na brukim difens long dispela yia. George Burgess tu i gat strongpela ran bilong brukim banis na ron longwe hap em stap yet. Dispela em wanpela naispela balens hat hit fron lain wantaim gutpela bal pilai fowet. Ol bekap sailtain i stap tu olsem Jason Clarke, Kyle Turner, George Burgess twin Tom na eks Panther Tim Grant husat

i laik soim em yet nau.

1. Bulldogs

Statim Pek: James Graham, Michael Lichaa, Aidan Tolman, Tony Williams, Josh Jackson, Greg Eastwood

Plantai i lukluk long ol dispela dog bilong woa. Maski lida Michael Ennis go pinis, planti lain i stap yet long fowet pek. Top prop bilong gem James Graham, ol Canterbury bois i sanap strong yet wantaim intanesenel bek rowa, Tony Williams, Josh Jackson na Greg Eastwood. Nupela Kangaroo David Klemmer na Nu Silan intanesenel Frank Pritchard na Sam Kasiano i stap tu olsem na yu ken lukim olsem ol i stap long top list bilong fowet pek long dispela yia. Dispela em strongpela grup husat bai mekim planti lain i kisim planti het pen long dispela yia.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna

Emi tuna
 bilong PNG



Moa mit na
 oil insait



Manufactured by:



RD Tuna Canners Ltd.



TUNA IN OIL

Sif givim tok stia long Tim PNG



senel na top spots man,"em i tok.

"Taim ol televisen lain tok-tok long yu, mi no laik lukim wanpela tim menesa o kosa i toktok wantaim blakpela tit o ret maus."em tok long ol lain save kaikai buai.

Kassman i tok strong tu long pasin bilong ol spot man na meri save aigris na paol pasin bikos mipela i no inap oraitim dispela kain pasin long kamap.

Ol spot man na meri mas gat rispek long ol yet na arapela tu na no ken mekim kain pasin olsem, wankain tu long ol tim opisel long no ken mekim dispela.

Kassman i askim olgeta lain long lusim ol pasin nogut olsem na lukluk stret long trening bilong ol na redim ol yet gut long bikpela pilai bilong Pasifik Gems long mun Julai long dispela yia.

Toktok em klia na stret we Kassman wantaim Tim Menesmen bilong em i no laik bagarapim bel na tingting bilong wanpela spot manmeri tasol menesmen laikim gutpela risal mas kamap long ol.



Richard Kassman

"I gat ol spot lain bilong bipo husat bin pilai long nem bilong PNG tasol ol no gat sans long pilai long ai bilong ol pipel bilong Papua Niugini long hia.

"Yu gat dispela sans nau olsem na mi laikim yupela yusim dispela sans nau.

"Dispela em swimming, ran, pait na ol arapela spot long ai bilong ol papamama, ol bubu, ol brata susa. Em asples blong yumi olsem na em sans stret bikos nogut yu no inap kam bek gen,"em i tok.

"Posisen long tim em bilong yu na no gat man bai rausim long yu, olsem na em wok bilong yu long winim ol lusim,"Kassman i tok.

Andrew Molen i raitim

fik Gems Richard Kassman i mekim dispela toktok long las wiken taim em bungim ol PNG spot manmeri long miting long Mosbi.

"Yu no nidim buai na mi no laik lukim yu smok na dring spak nabaut.

"Lukautim eksen na toktok bilong yu, pasin bilong yu em bikpela samting.

"Taim yu wokabout long ples bilong yu o long strit na taun bilong yu, mi laikim ol pipel i lukim yu na tok em boi blong mi o em gel blong mi

bikos ol i amamas long yu.

"Mi no laik harim ol i tok yu spakman bilong mekim trabel na mi no laik lukim yu wokabout wantaim blak tit bikos yu kaikai buai.

"Lukautim yu yet gut na soim olsem yu wanpela ne-

PNG Wimen's Va'a Tim etlits wantaim BSP presen beg bilong ol we ol bin kisim long las wiken long tupela de woksop bilong ol spots manmeri na menesmen long Mosbi: Poto Andrew. Molen/ PNG Olympic Committee.

"NO KEN kaikai buai, no ken smok o dring spak na bikhet o mekim trabel nabaut olsem raskol," Sif de Misin bilong 2015 Pasi-

Valvoline

PMV

DIESEL OIL

Valvoline

BOROKO MOTORS

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg
 Website: www.boroko-motors.com

PMV OIL

BILONG YUMI